



四溟山人全集卷之十二

東郡

謝榛

著

東郡

蘇潢

全校

赤城

陳養才

東郡
新安

張季彥
程兆相

全閱
詳校

七言律詩一百二十首

暮秋同馮汝言周子才登浩然臺賦得來字

祇園杖屨踏莓苔為愛霜花最後開當代風騷同把
酒極天形勝一登臺蒼蒼樹擁夕陽盡白白雲將秋
色來幾處名山問禪侶只今誰有惠休才

寄許右史克之

聞君策馬向中州，聊謝白雲湖上秋。
寧比曳裾任來去，祇緣薄祿仍淹留。
賞音齊瑟自成醉，授簡梁園誰共遊。
遙憶仙風許長史，月明長嘯登高樓。

趙大叅君正沈僉憲時雍同過旅邸漫成一律兼述鄙懷

幾年短褐惹塵氛，知已經過有二君。
白髮悲愁憶荆楚，清時懷古向河汾。
夜深靈動惟孤劍，天外晴飛只片雲。
丙魏應期匡漢業，莫令草野不相聞。

春日登伏牛山遙望秦中因憶栗士學馮汝

言二方伯李廷實大叅莫子良廉憲姜宗孝

紀恒甫二憲副

伏牛形勝鬱嶙峋，二月風光客興新。
半嶺夕陽惟照雪，千松寒色不知春。
春天連山勢全雄，晉地轉河流遠界。
秦寄語關中幾遊宦，虞卿祇是著書人。

虜後寄懷孔方伯汝錫

君看羽檄走神州，點虜攻城當暮秋。
幽事暫虛寒菊圃，悲歌獨倚夕陽樓。
鴈將殺氣俱深入，河捲胡風自倒流。
天上文星照孔宅，餘輝仍解萬家愁。

春日寄懷李方伯子高李廉憲化甫

二李朝天尚未回
百花含雨正全開
上林氣色三春動
北極風雲千里來
自出河圖龍馬瑞
同羈世網鳳麟才
遙知不負山濤薦
早晚緘書寄草萊

張憲副惟序挽詞

鳳凰城外定交游
聚散于今十五秋
淮甸風摧山嶽勢
楚天雲結廟廊憂
道窮人病雨兼雪
腸斷烏啼松與楸
絮酒真餘一灑淚
寂寥誰復問南州

同鄉程子賓丁卯春以廣東大叅擢山右廉憲及夏仍轉廣東右方伯戊辰春罷官北歸兩年之間往復萬里殊爲可嘆賦此寄懷

二十年前尚寶卿
一官萬里去來程
海天欲盡東南地
鄉國遙懸旦暮情
鷗鳥斜陽隨野釣
杏花微雨促春耕
翻嫌薇省殊多事
舊侶相過幾送迎

送王監察斯進還內臺

太行形勝帶桑乾
驄馬行嘶曉日寒
經濟上追周柱史
河山北拱漢長安
不辭當代頌封事
方起先朝幾諫官
御苑好花春作主
風光寧復舊時看

答楊中丞伯謙寄書

曠逸從來學阮宣
感君遙寄酒家錢
青馳草澤沙邊路
興足花時雨後天
經畫有方諸將列
塞垣無事萬

夫田不虛西北深宵夢龍劍分明紫氣懸

送蕭逸人歸永豐

久客天涯鬢欲皤西江歸去一漁蓑香鑪峰外煙雲
合石鼓潭邊雷雨多素月三秋黃鶴夢清風千古紫
芝歌山窓幽寂誰相伴隨意鳴琴向薜蘿

寓鄴懷洞庭山入陸子

遙憶江東陸士衡目窮天畔碧雲橫芳洲獨立漫長
嘯蘭櫂不來虛舊盟林屋煙霞千里夢洞庭書信十
年情吳楓鄴柳俱秋色日暮關山鴈一聲

春柳

黃鸝時復喚春遊陌上楊花漫不休幾向離筵搖落
日莫教長笛動清秋輕煙直接都門外細雨低臨灞
水頭謾繫王孫金絡馬萋萋綠草有人愁

春宮詞

長信宮中芳草生晚風獨立正含情時顰柳葉聽龍
駕誰隔桃花吸鳳笙金屋半開春寂寞珠簾不動月
分明燒殘蠟炬虛長夜遮莫同心結未成

湘江夢

夜深飛夢天南去向我長鳴白鶴雙秦女吹簫來碧
漢湘娥鼓瑟對清江行厨苦竹烹銀鱸別浦濃花照

玉缸醒後一燈猶卧病瀟瀟冷雨下西窓

暮春有感

世故悠悠鬢易華歲時多病轉堪嗟小園春上蘼蕪
色古道風吹楊柳花黃鳥獨鳴紛旅思白雲無定寄
生涯狂歌忽憶當年事月滿長安醉酒家

有感

出門何處覓丹丘天地茫茫鬢欲秋賈傳上書空有
意揚雄識字竟多愁雲飛碧落還無定水到滄溟自
不流客子孤懷成浩歎長虹斜掛鳳凰樓

李將軍尚倫獻策不果詩以慰之

獻策金門空自歸旌旗西下亂雲飛孤城夜月催刀
斗大漠秋霜犯鐵衣早晚廟廊應定筭古今功業在
知機百年幾欲收河套多少英雄有是非

送孫將軍伯卿赴邊

壯士掀髯浩氣橫黃沙白草漫邊城胡天劔倚風霜
凜漢壘旗翻日月明常憶古人多報國不逢知己莫
談兵秋來坐嘯交河上肯讓終軍獨請纓

秋日山中漫興

涼風倒吹沙石灣白波如練搖青山老蛟深蟠大澤
底獨鶴長叫空林間入雲樵子偶同話臨澗菊花堪

破顏短杖遲留淨塵慮耳邊飛溜清潺湲

秋暮書懷

木落風高萬壑哀山川縱目一登臺夕陽滿地漁樵
散秋水連天鴻鴈來白髮無情淹歲月黃花有意照
樽壘西園公子虛陳迹詞客于今說愛才

寄酬淮陰夏子吳門鄒子

江魚海鴈空相報楚調吳歌久不聞無那旅懷常抱
病更堪風物正離群馬融笛裏三秋月王粲樓前萬
里雲猶憶當時共樽酒一燈寒雨坐宵分

贈劉羽士

一出樊籠萬事違滿天風送薜蘿衣青藜杖外煙霞
色金液方中造化機窮海泛舟蛟自避深山採藥鶴
同歸知君已有僊人骨應待王喬汗漫飛

寄陳筆山兵憲時鎮泰州

龍抱明珠夜自輝風塵混迹復何依河山幾轉東南
盡旌節相逢故舊稀籌國登臺雲拂座憂時倚劔露
沾衣海陵獨眺吳天月長樂霜鍾憶瑣闈

病懷

鬢髮蕭蕭晝不冠他鄉風物若爲看花庭曬藥日將
午茅屋烹茶春尚寒久別親朋誰問病深憐兒女自

加餐是非高枕浮雲過遙憶西河舊釣竿

中秋宴集

滿空華月好登樓坐倚高寒攬翠裘江漢光翻千里
雪桂花香動萬山秋黃龍塞上征夫淚丹鳳城中少
婦愁詞客共耽今夜酒謾彈瑤瑟唱伊州

都下贈蔡子

中郎一別幾經春相望天涯感慨頻今日世情須濁
酒半生懷抱見騷人清光奪月珠無價紫氣凌空劍
有神京國淹留徒獻賦西風吹老楚江蘋

暮雨

忽漫濃雲西北生斜風驟雨入重城大川波動魚龍
氣空谷雷搜木石精阮籍感時心獨苦杜陵憂國意
難平萬家暝色孤燈外彈劍長歌此夜情

同潭公登望湖亭

孤亭縹緲碧天空巖壑長鳴萬樹風湖色微茫秋草
外山光黯澹暮煙中靜緣老去逢禪侶生計年來擬
釣翁莫訝踈狂詞賦客滄洲白鳥自相同

過朽菴上人故居

聞說香山獨到遲匡牀坐讀朽公詩長空月落江潭
水絕壁風鳴松栢枝當日鬼神曾護法卽今龍虎復

依誰影堂寂寞煙雲裏西極茫茫不盡悲

送周翰林汝威謫廬州

誰謂東宮官事閒幾年供奉鬢成斑憂時直欲迴天
意抗疏寧辭犯帝顏白髮孤臣含涕淚黃塵匹馬度
關山三秋且飲廬江水好待春風賈誼還

答夏良臣見寄

拾遺曾客錦官城獨擅當時大雅聲老我漳南還作
賦嗟君淮北久知名嚴霜苦雪松心古片月長江鶴
夢清潦倒同懷不同醉天涯徒有報書情

湧金亭晚酌亭在石上

山亭下瞰碧潭空天際雲霞落鏡中千古神蛟吞夜
月九臯靈鶴振秋風許由潁水心何逸莊叟濠梁意
自同寄迹乾坤須縱酒不妨醉卧荻花叢

曹茂才希孟遷居

燈下書聲山月斜夜深清夢到梅花樹頭黃鳥陽春
巷屋角青雲孝弟家自古人情多玉石卽今世事幾
龍蛇我來樽酒論騷雅簾捲中庭駐落霞

秋夜登覃懷城樓

滿城寒杵送人愁霜氣偏侵季子裘浮海有心聊閱
世御風無術且登樓虛簷高映蒼雲暮古堞平連翠

嶂秋迴首不堪鄉國遠斷鴻飛下蓼花洲

秋暮感懷奉寄內閣諸公

葉響空林天氣清仙人樓閣報新晴河山九月風煙色砧杵千家旅客情昔日黃花秋澹澹下灘白馬夕輕輕酒酣漫憶曹劉輩直北重雲鎖鳳城

夜集湯將軍莘夫宅

石榴葉黃秋滿庭綺筵酌酒燈光熒川雲初暝下白鴈海月欲高空翠屏召原關西幾時靜燕然石上何人銘封侯莫讓班定遠况復爾今雙鬢青

秋懷呈何栢齋侍郎

一望川原衰草平山雲慘澹壓孤城天陰鴻鵠向何處日落關河空復情遊子欲歸聊倚劔侍郎垂老不論兵秋來邊報正愁思聞道二師還北征

秋夜有感

老去生涯一短筇幾年河嶽寄行踪城邊瑟瑟高秋樹天外沉沉靜夜鐘風急沙洲移鸛雀雲深潭水護蛟龍邇來不見同心侶無奈狂歌阮嗣宗

望紫金山有作

隔河一帶碧嶙峋薄暮登臺注望頻古洞深松歸老鶴金山瑤草待幽人泉奔巨壑常風雨月傍高壇自

魁神丹侶有期應不負三花樹底醉長春

早度齊嶺

早發孤村齊嶺東登攀時見海霞紅雲根半出水光
外木葉正酣霜氣中疊嶂懸崖惟鳥道深林曲磴有
僊宮行行獨把蒼藤杖好訪還丹鶴髮翁

陽臺宮

古燈蘿子居此飲井泉服人參仙
去白雲洞名唐司馬承禎修道處

探竒迢遞來珠宮岡巒煙色青濛濛一聲兩聲自幽
鳥千樹萬樹皆秋風地留參井草堂廢洞掩白雲丹
竈空僊馭杳然不復見蒼涼月出蓬萊東

天壇山二首

薜衣草履離塵氛曳杖日隨猿鳥群已黃未黃老樹
葉欲動不動空山雲擬招作賦班內史兼有寫經王
右軍太乙泉頭共清酌嘯歌莫遣人間聞

日上大荒寒霧開重巒沓嶂爭崔嵬山靈制虎晝不
出牧子驅牛時復來錦石低鄰薜蘿邈絳雲高捧金
銀臺此間勝絕好遊眺謾說祖龍東海迴

晚登天壇絕頂

下有玉母洞

遙向蓬壺探海月謾扶藜杖嘯天風路盤翠壁千層
上人在蒼山萬點中王母鸞歸深洞閉軒皇龍去古
臺空憑虛極望斷消息柿葉滿巖秋自紅

秋夜聞笛

塞鴻欲下何遲遲長笛隔樓誰一吹月冷關山不盡
意風高楊柳無全枝征人空館夢迴處少婦孤燈腸
斷時况我朋游半彫落山陽作賦千年悲

小有洞

洞口瑤花秋尚開老猿孤鶴幾徘徊松巖獨把道書
坐蓬海虛疑僊駕來赤葉風翻千仞澗蒼崖雲濕萬
年苔誰知異代還惆悵底事桃源采藥迴

夜坐感懷寄徐文山

獨夜寒蟬鳴不休虛窓起坐憶南州山開薄霧來明

月天送長風作冷秋華髮漸多驚老大壯懷無奈歎
沉浮美人一別江關渺肯采芙蓉慰我愁

華盖山晚眺

一入名山深復深躋攀不倦漫長吟歸鴉千點日銜
嶺猛虎一聲風滿林勝地自堪依道侶丹砂誰解變
黃金茅君桂父渺何處時聽半天鐘磬音

秋日懷弟

生涯憐汝自樵蘇時序驚心尚道途別後幾年兒女
大望中千里弟兄孤秋天落木愁多少夜雨殘燈夢
有無遙想故園揮涕淚况聞寒鴈下江湖

黃河舟中漫作

黃河一望青天平夏禹神功千古情日出水東鴈鴛
起風來空外波濤生權隨超忽自無定身在杳茫誰
不驚舉目俄然近沙渚傍人遙指梁王城

朱僊鎮手岳武穆

中原何幸見將軍一劔長驅胡馬群戰伐功高天意
在廟堂策定帝圖分只今營壘空秋月終古旌旗有
暮雲遺恨幾多堤上柳冷風淒雨不堪聞

聞老六談邊事

少小從軍老病侵鐵衣征戰歲年深天寒野火燒荒

塞月黑山精嘯古林千載干戈堪灑淚二秋笳鼓數
驚心平沙亂草迷枯骨漢武窮兵怨至今

梁園春雪

二月都城凍不消雲黃地白思寥寥園林幸未舒桃
萼風雪寧堪妬柳條欲觸曉寒尋野徑漫探春意過
溪橋惠連留滯空詞賦梁孝同時想見招

題孟得之園竹

西風萬木正彫殘脩竹娟娟謾自看爲愛清陰搖綺
席不教新笋上金盤色連淇澳秋霜淨聲徹瀟湘暮
雨寒中有棲遲九苞鳳野雲長護碧琅玕

題王大伾侍御別業

野扉長掩石林幽，林外寒溪汨汨流。
老鳳無心橫碧漢，高雲何意落滄洲。
天王側席兵戈日，柱史閒居草樹秋。
二十年來耽著述，不知華髮爲誰憂。

送吳將軍北伐

連營鼙鼓送斜曛，北伐應期霍冠軍。
鐵馬踏殘胡地草，金戈揮斷朔方雲。
將材此日寧虛負，邊事頻年不忍聞。
豪俠從來多慷慨，幾人鐘鼎勒奇勲。

中秋無月

不見青娥駕紫鸞，孤樽愁思坐更闌。
山河莽莽迷瓊

樹風雨冥冥，失玉盤。梁苑池臺空，度夜漢。家宮殿不勝寒，欲知何處秋光好，天柱峰頭試一看。

送白子鍾南遊

廣陵南去水浮天，楓葉蓼花秋正妍。
島嶼遙連三楚樹，風雲低逐九江船。
驛亭津閣好沽酒，黃橘白魚寧惜錢。
汗漫直須窮勝絕，子長高躅憶當年。

暮秋憶馬立齋李後溪

落落商歌日幾迴，世情聊把菊花杯。
斜陽又下嶺西去，候鴈還從天北來。
宋玉此懷誰與會，虞卿異代自同哀。
長安有客深知已，潦倒漸非獻賦才。

冬日寄酬李給事仲西

時謫天雄

烈風吹斷野桑枝，雲外孤鴻北。叫時雪滿山城，驚歲暮。水連河海，得春遲。幾年謫宦，身多病，獨夜悲歌鬢。欲絲留滯，天南憂思切。夢飛青瑣，月明知。

送陳廣文蓋卿之上都

元龍此別意，何堪送爾長。歌酒欲酣，野岸曉鴉催去。客石橋煙柳，駐征驂。清朝祿薄，寧爲屈壯歲，官閒可自甘。六館有時懷謝眺，高秋鴻鴈下漳南。

暮春

世故悠悠鬢易華，歲時多病尚天涯。小園春盡棠梨

樹，古道風吹楊柳花。濁酒孤琴聊客意，黃蜂紫蝶向誰家。坐憐芳草雨中色，不見美人空自嗟。

寄沈青門

青門居士好風神，久客京華白髮新。班馬座中呼酒夜，金張館下放歌晨。宮花五色漫經眼，御柳千條低傍人。何日扁舟尋故侶，與君同醉五湖春。

林慮北園待李子周不至

北園臺榭雨晴初，坐對群峰澹自如。四野暝煙飛白鳥，半池秋水落紅蕖。海天月近幽棲處，石樹風生浩唱餘。清夜放懷須酒伴，隔林猶自聽來車。

望天平山作

峭壁高盤空外青，寺當絕頂幾人經。
長松老檜招群鶴，古洞重巖隱百靈。
野徑漫吟秋瑟瑟，雲蘿遙望夕冥冥。
西風醉殺清狂叟，却誤深山采茯苓。

憶天壇山

目極天壇路渺茫，往時高步采瓊芳。
白雲壑斷笙音度，紅葉林空酒氣香。
仙客並遊心自逸，野猿一見意相忘。
醉呼童子收詩草，月上千峰卧石牀。

寄紫微宮李道士

憶昔僊宮宴賞頻，步玄曲調一時新。
玉壺倒瀉滄海

水瑤草平分閨苑，春簷外片雲閒似我。
階前孤鶴老於人，別來幾度驚秋序。
夢繞煙蘿古澗濱。

贈王羽士

爛舟道人何所之，白鶴赤鳳常相隨。
雲霞舒卷自無意，寒暑往來渾不知。
海月低涵玉膏酒，天風徐動冰桃枝。
三山水涸巨鰲死，獨抱玄虛無盡期。

懷僊詩

我愛琴高乘鯉魚，洞天六六行廬萬年松。
下丸靈藥千仞峰頭著，道書衡嶽夫人招不去。
流沙老子問何如有時，獨枕雲根卧秋月。
輝輝滿太虛。

送張良玉還任城

抱琴孤嘯天漫漫醉裏涼風吹鵝冠世曠能傳廣陵
曲調高誰賞雍門彈海蛟逼岸水雲動山鬼傍人松
月寒翻然東歸歲欲暮太白樓上凭闌干

春日洹上過田深甫對酌

梁客才名康樂齊北來獻賦此幽棲春流迴合孤村
外晚照蒼茫萬柳西煙浦橫舟閒把釣花臺對酒漫
分題太行一望高無極相約登臨杖短藜

牡丹

洛下名花迥絕塵寶闌斜倚見風神香飄梁苑聚僊

子色壓漢宮無美人宿露暗侵芳骨冷曉霞低照靚
妝新謝家祗解題紅藥此日狂吟醉好春

無題二首

楚女春心不自持月明誰唱竹枝詞瓊簪玉珥何顏
色翠幕朱闌且歲時燕子樓空傷往事杜鵑花老負
歸期江頭幾度風和雨轉覺湘靈瑟調悲

窓有蛛絲鏡有塵小樓岑寂坐傷神鴛鴦哺子空經
眼桃李飛花不待人洛浦佳期孤皓月湘江幽怨寄
青蘋玉環舊日徒相贈腸斷歸鴻又一春

送金廣文少賁之長沙

前蜀中令

數卷孤琴非俗計短亭細柳是王程舊從彭澤懷陶
令此去長沙弔賈生夜月子規鄉國夢春江杜若楚
騷情碧湘門外風雲闊華髮無勞怨不平

越女歌

曉風吹散江天霞越女出門來浣紗秋水低飛鸛鶴
子煙汀半落芙蓉花慵妝雅素少同調顧影遲廻聊
自嗟不遇寒修一懷古苧蘿山下西施家

和高南溟過井陘千佛嵯韻

聞君偶話宦遊年琴鶴相將落日邊迥邈山城流水
抱參差石樹斷嵯懸空中千佛歸無象雲裏孤僧住

有緣登覽何當同紀勝長吟北望渺蒼煙

寄南都盧涑西司業

鍾山靈秀一龍蟠太史南遊好縱觀揚子江橫天地
合石頭城壓雪濤寒談經道氣空今古作賦心思入
渺漫千里有懷應北向鳳臺高倚碧雲端

答武進李宰元素惠六朝詩

故人送我六朝詩夜半燈前坐讀時清廟朱絃彈古
調玉樓瓊樹發春姿共言蘇李傳騷雅那識曹劉是
路岐極望江山增感慨長風吹鴈報君知

司李春溪員外張栗齋隱君夜酌

吏部停驂訪隱淪一樽披豁見情親
燭花照夜仍留客斗柄低空欲近人
李白醉含心迹遠張衡愁入鬢
毛新相逢無那還相別楚樹燕雲又幾春

洹上曉起同田太室閒步

溪上茅茨生曉寒斷霞浮靄須臾看
飛鷗去水不盈尺初日照人纔半竿
偶依林臯足曠達何必箕穎堪
遊盤與君隨意採芳芷清露滿裳猶未乾

九月十日登清涼峰無酒無菊

是歲閏九月菊未花

昨夜重陽山下棲曉來絕頂訪招提
立板日月諸天近坐瞰煙嵐萬頃低
杜甫祗憑詩自遣陶潛安得酒

常携擬看石徑黃花發還與休公作舊題

征夫歎

漠北單于射獵雲中都護擁旌旄
征夫淚墮故鄉遠戍角聲悲寒月高
絕塞胡霜侵劔戟陰山鬼火照蓬蒿
從來百戰輕生死獨倚轅門感二毛

送李秀才西遊謁曾總制

鳴鞭躍馬欲何之薄暮秦關入望時
蒲海風聲連鼓角葱山雲色亂旌旗
材官獨守憂懷重壯士長征捷報遲
挾策羨君趨幕府勲名自古屬相知

登太行山西望有懷蘇舜澤中丞

太行勝絕橫霄漢有客登臨思不休
鴈度千峰還北向河滎三晉竟東流
胡笳遙動黃雲暮塞馬長嘶白草秋
慷慨中丞時仗策漢家天子莫深憂

暮秋病懷

三春藥餌秋仍病四野煙霜葉正飛
空谷佳人情獨感碧霄玄鴈意多違
鄒陽浪迹留詞賦張翰高懷遠是非
落魄此生歸計晚西風又老故山薇

秋夜

廣除幽寂坐深更葉下空林作雨聲
獨鶴徘徊山月轉老龍呼吸水雲生
高秋興逼陶彭澤曠代神交阮

步兵時復悲歌風露裏菊花相對一攄情

寄劉一軒少叅

春草句工慚謝監扶風歌古憶劉琨
年來幽况音書達老去名交意氣存
湖海秋天雙白鬢山城夜月一清樽
還期下榻披心曲騷雅同君取次論

千秋頌

平樂筵開冬月初天風吹鶴下前除
山河萬古鍾元氣宮殿千春倚太虛
華日高輝龍袞上彩雲低度鳳笙餘
稱觴不盡詞臣意東海壺公有報書

次顧霞山述懷韻

客中又過黃花秋不見故園空倚樓重霧遙吞疊嶂
色青天倒入滄江流酒杯聊爾破孤悶詩句漫然題
四愁尚憶長干舊遊處美人贈我珊瑚鈎

還家

二十餘年寄鄴城歸來誰不訝狂生白頭况帶風塵
色青眼深知父老情共話江湖多故事自憐詞賦亦
空名仲宣踪跡猶無定遙指浮雲意未平

酬鄭車谷中丞劉嵩陽給事見寄

仲冬野望風凄其南國渺然生遠思松栢叅天鶴自
立冰霜滿地龍何爲劉楨此日獨高枕鄭谷幾年惟

賦詩我欲乘舟訪幽躅楚江春在梅花枝

酬高穎湖太守見寄

南州刺史愛風騷千里傳詩意獨高日上峰巒增氣
色天連江漢動波濤欲同樽酒心徒切遙想襟期夢
亦勞渤海舊家勲業遠少陵寂寞竟蓬蒿

千秋頌上恒易趙殿下

殿閣祥雲繞鳳麟蟠桃特出薦佳辰詞林共仰天葩
潤藝圃同瞻睿藻新招隱久虛青玉案論交先訪白
綸巾仙胎未識金銀氣鶴筭平分閬苑春

次汝錫夏日宴社友之韻

綠陰庭院好留賓
賓主情高久駐輪
興劇還期平樂酒
調同亦是建安人
且停絲管孤城夕
共賦雲霞五色新
醉折榴花插吾鬢
寧知老病異鄉身

季春巳酉夜大風有感

夜半狂風吹到明
杜門不信是春聲
撲翻百鳥無寧處
奪盡千花何限情
汾水到波天不定
晉山走石澗將平
卽今紀異誰同賦
更待蘭臺宋玉成

感懷走筆

客居無定緩歸期
西盡邊城幾故知
浪迹久違陶令社
鬱懷何限阮公詩
醉中長夜輕千古
豪右浮雲漫

一時鳳鳥不來春
又去桐花零落最高枝

北園偶成示炬上人

吾生浪迹鬢皤然
結社東林已有緣
獨卧上方聊習靜
相過竹院又談禪
一泓水石窺時月
百尺竿頭立處天
石踞松蟠龍虎在
松枯石爛定何年

夏夜大雨寄懷崔駙馬懋仁

鄴王城外雨漫漫
旅客驚心夏欲殘
平地波濤吞道路
極天雲霧失峰巒
踈燈閃閃滄洲夕
亂葦蕭蕭白鷺寒
遙想月明吹鳳管
倚樓何處望長安

七夕寄拙園憶弟

平生守拙老依然寄拙園亭七夕天兒女巧心非我
事弟兄僻性有誰憐花間絲管輕風度樹杪樓臺細
月懸不見女牛這一水半空秋影落樽前

寄南都蔡侍郎子木

聖朝南北兩長安班賦摘毫信不難臺去鳳凰乘月
待山連龍虎出雲看夜深斗極心應遠秋老天涯鬢
欲殘人在鄴中曾憶否一聲旅鴈下江干

次孔丈冗中漫書之韻

欲求滿意幾時閒偃仰誰甘寂寞間老去數椽依亂
草興來片石卽名山慰懷自有樽中綠鑷鬢翻多鏡

裏班朋好經過問奇字莫教稚子閉柴關

送吳節推子清被徵北上

早歲摘文天有成法曹心迥月同明三年佐郡無他
累千里徵車重此行北極晨光開殿陛西山爽氣薄
宮城試看白日浮雲盡抗疏于今好著名

冬夜同南岑諸詞文集古勝園亭賦得吟字

曾留信宿正蛩吟有約重來雨霰深年老交游惟氣
節夜寒鳥雀共園林燕歌自遣飛揚興晉俗相依去
住心自古詞人在羈旅誰非輶軻遇知音

寄李蒲溪侍御按吳中

豸冠千古力匡時何獨乘驄桓典期地有嚴霜摧毒
草天將好雨活枯枝野蛟遁海殊無迹山鬼潛崖信
有知吳會行臺勞不寐鏡中應益數莖絲

寄蔡春臺兵憲兼憶王鳳洲廉憲

兩守姑蘇何太勞君今海上擁旌旄龍騰地得三春
雨鯨縮天收萬里濤歲稔不憂吳稅重時平謾學楚
詞高陸機相近應同賦秋氣爭雄見二毛

寄莫中江方伯朱文石司業范中方大叅袁

太冲正郎諸公

鶴唳華亭涼月多島夷共喜息兵戈相期勝事耽騷

雅各賦閒居愛薜蘿南北存亡惟老淚江湖聚散獨
悲歌誰知朝野懷同感祇恐秋風海又波

寄黃質山隱君

南國書來驛路賒高人爲我獨長嗟廣交排難元多
事盛世藏名自一家落日浮雲天外色清秋白藕露
中花壯心甘向吳門老能使山靈護鑊鉞

寄上嚴養齋閣老

海色江光併地靈驪龍且卧有時醒從教禪院松花
老幾度虞山楓樹青糟粕咀多聊酒頌旗槍味別更
茶經先朝東閣群才散喬木雲深野戶扃

寄門人王少海陸石虹二子因悼商洛山同
賈於鄴未幾病歿久淹旅櫬作詩諷之

叔牙義氣亦空聞 帝里名交鄴下墳異土抱病骸
骨在同鄉負德死生分逍遙燕市酣春色嗚咽河流
暗暮雲龍種徒能千里足鳳雛何用九苞文

寄懷顧上川逸人

獨步荆南又向闕狂歌疑是接輿身荔枝鮮味三年
客鴻鵠高飛四海人綠酒遣懷隨處醉黃金到手卽
時貧幔亭仙會雲霞隔誰共攀蘿爲訪真

倪湛川廣文自海陵惠履賦得詠物體寄酬

謝履高蹤出垢氛其如有齒破苔紋春泥踏處芳菲
合野草行時阡陌分登眺相隨猿鶴侶往來寧避鹿
麋群綴珠獨陋平原客我向蓬山躡海雲

寄錢兼山員外

一官踈懶合丘樊遠近書生多在門白璧新知徒有
識青雲舊侶半無存地通湖海三吳脉天造文章萬
古源遙憶花橋春事過苔階鳥雀共寒暄

寄皇甫百泉僉憲

玄晏何時序有成兩都曾賦待齊名病辭楚醴衡茅
掩春到吳江杜若生地迥獨兼龍虎勢臺空誰繼鳳

鳳聲水犀甲士疲征伐愁鬢知君白幾莖

張嶺山廉憲晉陽以書見招因擢南京都憲
不果行賦此寄意

路出中原愜壯遊試看形勝舊皇州秣陵山抱連天
起揚子波平蕩日流親友寄書通蜀舸朝廷息戰佩
吳鈎鳳凰臺上仍相約共賦江南萬里秋

答朱醉石上舍見寄次來韻

同懷兩地曠交游特向汾陰問去留昭代應憐鸚鵡
賦麗情莫訝鸛鷄裘幾經風雨人間路獨攬雲霞海
上樓西隔太行書萬里杜蘅又老大江秋

寄沈鈞玄僉憲

自返虞山回武林鍊師真訣遠相尋白雲舒卷東南
潤丹氣微茫洞壑深避世應知踈懶性求仙難定寂
寥心杏園故侶今星散木落錢塘愴夕陰

天寧寺禪房與徐世鳴譚詩偶成

落筆驚人自古難惠休應作六朝看離騷夜鼓湘靈
瑟大雅時登漢將壇鷺嶺嵐光簷外動鯨波海色座
中寒君家徐幹流風遠要使千年說建安

寄江南李巽川許習盤二正郎兼憶張懷洲

黃門

建業同官勞未休三吳有待稻花秋署郎各繫江湖
念計吏相關風雨愁別意且須通白鴈老年祗合在
滄洲邇來青瑣懸何事草䟽深宵重倚樓

寄周秀津由河南節推轉安慶二守

皖城復佐有餘才到日春藤花正開 帝闕壯心干
氣象郡齋幽意任莓苔活魚爲鮓盈盤出凍笋供厨
入饌來祿養百年應獨喜夕陽偏照孟宗臺

四溟山人全集卷之十二

終

